

## □ البيه المأمور □

— منين ازاي؟ م الحكومة، ما أنت ممسوك مع الحكومة  
وكنت بتشتغل مع الحكومة .

— وهو اللي بيشتغل مع الحكومة لازم يسرق؟

— أمال هو بيشتغل ليه؟

ضحك الأستاذ حمد الله ضحكة عريضة قبل أن يقول :

تصدق يا الله، أنا عمرى ما شفت حد بيشتغل لوجه الله، كله  
بيهر، بس الخايب اللي زى محسوبك هو اللي بيقع، وبصراحة  
بقى ما فيش حد غريب معنا، قوللى إنت عملت قد إيه؟ .. مليون؟  
كان شديد الثقة بأن العبد لله الجالس أمامه هبر هبرة كبيرة،  
وكيف لا؟ وأنا لا ينقصنى الذكاء ولا الحيلة وأعمل مع الحكومة  
فى نفس الوقت .. وعندما امتنعت عن الإجابة عاد يسأل :

— نص مليون كده؟ إذا قلت لا هزعل منك قوى، مش معقول  
واحد زيك يهبر أقل من كده .

ولم أجد مبررا لمناقشته، فغمزت له بعينى غمزة ذات معنى،  
وقلت له :

— يعنى .. الحمد لله

صاح متهللا :-

— أيوه كده .. خلاص فرحتنى

ثم ضربنى بيده على كتفى وقال :

— لو قتلتى لأ، كنت زعلت منك قوى، مش معقول واحد زيك  
حدق وعينه مفتوحة ويطلع م المولد بلا حمص، دا مولد يا عم  
وصاحبه غايب، دنا أعرف ناس أقل منك بكتير وعملوا ملايين، دا  
احنا عندنا واحد م المصلحة معفن، - واللى خلقك أنت - عاوز له  
مصلحة بحالها عشان تعد الفلوس اللي معاه .

وتركنى حمد الله وانصرف، وتوطدت الصلة بينى وبينه بعد